

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst (“Službene novine Zeničko-dobojskog kantona”, broj: 7/10), te člana 199. stav (2) Poslovnika Skupštine Zeničko-dobojskog kantona – Novi prečišćeni tekst („Službene novine Zeničko-dobojskog kantona“, broj: 7/12, 12/13 i 10/18) na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 152. sjednici, održanoj dana 20.07.2018. godine, d o n o s i

ZAKLJUČAK

I.

Prihvata se mišljenje Ministarstva za rad, socijalnu politiku i izbjeglice Zeničko-dobojskog kantona na podnesenu Inicijativu poslanika Senada Trake, kojom se predlaže izmjena člana 115. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11, 3/15 i 2/16).

II.

Zaključak sa Mišljenjem iz tačke I. upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/18.
Datum, 20.07.2018. godine
Z e n i c a

PREMIJER

Miralem Galijašević

DOSTAVLJENO:

1x Ministarstvo za rad, socijalnu politiku i izbjeglice,
1x Stručna služba Skupštine,
1x a/a.

Na 29. sjednici Skupštine Zeničko-dobojskog kantona održanoj 30.10.2017. godine poslanik Trako Senad, u okviru predtačke dnevnog reda: „Postavljanje poslaničkih pitanja pokretanje inicijativa“, podnio je Inicijativu za izmjenu člana 115. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11, 03/15 i 02/16) - u daljem tekstu Zakona.

Polazeći od podnesene poslaničke Inicijative poslanika Senada Trake, Ministarstvo za rad, socijalnu politiku i izbjeglice daje:

Mišljenje

Predmetnom Inicijativom predlaže se izmjena Zakona, tako da se član 115. stav 1. i 2. mijenja u smislu povećanja procenta za iznos dječijeg dodatka. Po istoj inicijativi u 2016. godini Ministarstvo je dalo mišljenje i isto je prihvatila Vlada Zeničko-dobojskog kantona Zaključkom, broj: 02-02-6932/16 od 29.03.2016. godine. Ovim mišljenjem je ukazano da je predložena Inicijativa plemenita, humana i u najboljem interesu djece i porodica sa djecom, međutim, zbog ograničenih sredstava za ove namjene u Budžetu Kantona za 2016. godinu, Ministarstvo nije podržalo predloženu Inicijativu.

U međuvremenu, Ministarstvo je nastojalo da se poboljša položaj porodica sa djecom i u tom kontekstu tražilo rješenja da se obezbijede veća budžetska sredstva kako bi se pristupilo izmjeni Zakona. Naime, u 2018. godini za pravo na dječiji dodatak utrošeno je 3.645.940,03 KM, a povećanje iznosa dječijeg dodatka samo za 1%, na ovoj poziciji u Budžetu bi trebalo obezbijediti više za oko 1.600.000 KM, odnosno povećanje naknade sa 14,74 KM na 22,11 KM po članu 115 stav 1. i povećanje sa 22,11 KM na 29,48 KM po stavu 2. istog člana. Zbog toga ovo Ministarstvo nije moglo podržati podnesenu Inicijativu, niti pristupiti izmjenama Zakona.

Također, Ministarstvo je u proteklom periodu učestvovalo u izradi, podržavalo i davalo mišljenja na Nacrt zakona o podršci porodicama s djecom u Federacije BiH.

Tekst ovog Nacrta Zakona utvrdila je Vlada Federacije BiH na 149. sjednici, održanoj 05.07.2018. godine, a uređuju se osnove materijalne podrške porodicama s djecom, zatim materijalna prava za podršku porodicama s djecom, postupak ostvarivanja prava, uslove i način za ostvarivanje prava, finansiranje materijalne podrške porodicama s djecom, nadzor i druga pitanja od značaja za ostvarivanje podrške porodicama s djecom u FBiH. Ova podrška ima za cilj da se svoj djeci osiguraju približno jednaki materijalni uslovi kroz ostvarivanje prava na dječiji dodatak i druga prava, te zdrav i pravilan psihofizički razvoj u porodici. Visina dječijeg dodatka propisana je u iznosi 6%, a za korisnike koji imaju pravo na uvećani dječiji dodatak 8% od prosječne isplaćene neto plaće u Federaciji Bosne i Hercegovine za prethodnu godinu.

Naime, s obzirom na aktuelni proces na nivou Federacije BiH, smatramo da nije opravdano sada pokretati proceduru za izmjenu kantonalnog zakona iz oblasti dječije zaštite, zbog čega se i predlaže da se ne prihvati inicijativa poslanika u Skupštini Zeničko-dobojskog kantona Trako Senada za izmjenu člana 115. Zakona o socijalnoj zaštiti, zaštiti civilnih žrtava rata i zaštiti porodice sa djecom („Službene novine Zeničko-dobojskog kantona“, broj: 13/07, 13/11, 03/15 i 02/16).